

0+

"Поро пиалан улыт яндар шўман-влак:  
нуно Юмым ужыт" (Мф. 5:8).

# ШўМ-ЧОН ИЗОЛЫК

2013ий март  
годсек лектеш.

МАРИЙ ПРАВОСЛАВНЫЙ ЖУРНАЛ 5-ше (97) №, 2021 ий май

Йошкар-Оласе да Марий Элысе Высокопреосвященнейший митрополит-Иоаннын благословитлымыже почеш



**Руш Православный Черкысе  
Марий митрополийын  
ўшанле шочшыжо-влаклан  
Йошкар-Олан да Марий Элын  
митрополитше Иоаннын  
КУГЕЧЕ САЛАМЛЫМАШЫЖЕ**

## **ХРИСТОС ЫЛЫЖ КЫНЕЛЫН!**

**Ч**ыла ача, иза-шольо ден ака-шўжар-влак, тўнялан чын куаным кондышо кугече йўдын мыланна эн шерге улмыжым ме палена. Тудын дене тўр шогышо нимо уке да лийын ок керт, вет тиде кугу куан, осалым да айдеме тукымын тушманжым – колымашым – сеныме куан. Святой Черке мыланна Христосын Ылыж кыনেме историйжым почеш.

Христосын орланыме да колымокечыже-влак эртат. Христосын Аваж ден йўлышў шўман Мария Магдалинам неле ойго темда. Шуматкече шыпым закон кўштымў наре кучыме, нуно Шўгарым ончалаш пычкемыш йўд годымак куржыт (Мф. 28, 1). Шўгарым да тудын воктен орол-шамычым ужын, Мария Магдалина мўнгеш кая. Юмын Ава Мария Эргыжын Шўгарже воктене кодаш. Тудын аралтышыже – Юмо да ег-влак ончылно праваже, эше аван шижмашыже, сандене орол-шамыч деч лўдын огыл.

*Умбакыже - 2-шо лаштыкыште.*





Юмын Аван тушто улмыж годым Юмын кугу Тайныже мланде чытырналтмаш гыч тўнгалын. Господьын Суксыжо кава гыч волгенче гай волен, тудын Пылпомышысо волгыдыжо йўд пычкемышым волгалтарен. Тидын деч лўдын, орол-шамыч колышо гай лийыныт (Мф. 28, 2-2). Ушышт пуримеке, салтак-шамыч олашке куржыныт да мо лийме нерген первосвященник-влаклан каласкаленыт. Христосын Ылыж кынелмыж нерген Юмын Авалан Суксо каласен манын, преданий ойла. Суксын Поро уверым ойлымыж деч вара тудын волгыдыштыжак Яндар Ўдыр Мариялан икымше гана Господь Шке конча. Ава улмыжлан кўра Тудлан Тиде кончымаш лийын манын, Юмын Ава тидын нерген каласкален огыл, ўнгышын шылтен.

Суксын волгыдыж дене волгалтарыме ты йўдым Юмын Аван ончылныжак Христосын икымше эр кумалмашыже тўнгалын. Господьын Шўгарже воктене орол-шамыч колышо гай киеныт. Могай ўрыктарыше жапыште нунылан илаш пўралтым палыде, уло тўнясе калык шып мален. Пылпомыш Кугыжанышыште гына муро йонген: «Утарыше Христос, Тыйын Ылыж кынелметым Пылпомышто Суксо-шамыч моктен мурат». Ты Кугече йўдым Суксо-шамычын мурышкышт чон йывыртен ушнена да йодына: «Мландымбалнат мемнам яндар шўм дене Тыйым мокташ йўрышым ыште!» Ылыж кынелмым увертарен, «Христос Ылыж кынелын!» манын, икымше гана кычкыралме годым шўмна кузе йывыртен кўлтка!

Христос Ылыж кынелме Кугу кечым Христиан историйыште айдеме тукум тўрлў семын пайремлен! Юмо деч лўдшў мирносоице ден апостол-шамыч йывыртеныт. Христос чынжымак Юмын Эргыже манын, рим сотник дене пырля ўшаныше-шамычым кугу куан авалтен (Мф. 27, 54). Но лийыныт эше иудей калыкын кугуракышт,

первосвященник ден фарисей-шамыч, Каиафа ден Пилат, Иуда-предатель да мыскылыше-влак. Нуным Христосын Ылыж кынелмыже кузе чот ойгандарен, шыдештарен, Христос деке, Тудын туныктымашыж деке ужмышудымашым луктын. Историйым ончалаш гын, ег-шамычын пашаштышт да койыш-шоктышыштышт тиде уэш да уэш тыгак палдырна.

Христосын Ылыж кынелмыже Юмын ўнгышў да поро койыш-шоктышан кулжо-шамычым кызытат куандара. Нуно Кугу пўтў мучко кажне кечын Христос почеш каят. Христосын орланыме Лўдыкшў арнян Тудын дене пырля Ыресыжым нумалыт, Ыресыште кечымыжым чаманен ончат, Кугу Кугарнян Шўгарже дек ужатат. Тыгай-шамыч Христосын Ылыж кынелмыжым ужыт да йывыртен мурат: «Христос колымаш гыч Ылыж кынелын!» Христосын орланымашкыже да Ылыж кынелмашкыже ушнен, сулыкым касарыме Святой Таинством эртен, Святой Пырчесым кўргышкына налын, Кугече пайремлан шкенам ямдылена гын, кугу куан мемнамат пўтынек авалта.

Господь дене ушнымаште йўратыме чыла ача, иза-шольо ден ака-шўжар-влак! Христос Ылыж кынелме эн волгыдо Кугече пайрем дене тендам саламлем! Тўням Утарышым сўрвалаш тўнгалына: уло Сандалыкын пайрем куанжым мыланна ўмыр мучкылан ситарыже. Порым пуышо Пылпомышысо тул Господьын Священный Шўгарышкыже кызыт марте эре волен. Тудо Господь Иисус Христосын илыше улмыж гаяк илыше ўшанымаш дене мемнан шўмнам ырыктыже.

Христос чынак Ылыж кынелын!  
Йошкар-Ола,  
2021 ий Христосын Кугечыже.



## ВОЛЖСК ДА ШЕРНҮРЫН ЕПИСКОПШО ФЕОФАНЫН КҮГЕЧЕ САЛАМЛЫМАШЫЖЕ

**В**лыж кынеше Господь дене ушнымаште йӱратыме да кугун пагалыме ача-влак, Юмым йӱратыше иннок-шамыч, чыла иза-шольо ден ака-шӱжар-влак!

Кугун куанен, чон йывыртен да Господь Иисус Христослан каласен мошташ лийдымын чот тауштен, мый тендам чыладам, тыгак тендан лишыл егда-влакым священный да утарыше пайрем дене – Господын Кугечыж дене – уло шӱмын саламлем.

### ХРИСТОС ЫЛЫЖ КЫНЕЛЫН!

Христосын Кугечыже – «чыла пайрем деч кугу пайрем да чыла йывырымаш деч кугу йывырымаш» – мемнан чоннам поро куан дене тема. Апостол-шамыч Иисус Христосын чаплын ылыж кынешмыжым пален налыныт да тыгай куан денак темыныт. Тудо кызыт кугече мурышто йонга: «Утарыше Христос, Тыйын Ылыж кынешметым Пылпомышто Суксо-шамыч моктен мурат, да мландымбалнат мемнам яндар шӱм дене Тыйым мокташ йӱрышым ыште».

Кугече годым икте-весым саламлымаште, тудын кок мутыштыжо, айдеме ылышыште мо эн кӱлешыже каласалтеш: Христос Ылыж кынешын! Христос чынак Ылыж кынешын! Айдемын Юмо деч коранмыжым Юмын Эргын Ыресеш орланымыж дене тӱлен налме, тидын дене мемнан сулыкна эрыкталтын да колымаш пытен. Тудын чыла сенгыше да чапле Ылыж кынешмыж дене мыланна у ылыш пуалтын – ончыкылык курымын мучашдыме ылышыже. Ме тидлан ушанена да тидымак вучена, вет Христос Ылыж кынешын.

Тӱнялан утаралтмаш толын: Христосым тойымо Шӱгар гыч тунам колымашын пычкемышыже олмеш колыдымашын Волгыдыжо волгалтын! Колымашым сенгыше Христос гоч ме «у ылышым», курымаш ылышым, муынна» (Рим. 6:4). Утарышын тӱняш молан толмыжо уло тӱнялан почылтын: «Кузе Адам гоч чылан колат, тыгак Христос гоч чылан ылышым налыт» (1Кор. 15:22).

Кап колымаш шонго ден самырыкын, лишыл да тора ег-влакын ылышыштым кызытат кӱрлеш гынат, Христосын Ылыж кынешмыже мыланна курымаш ылышым пӱлекла! Сулыкым ыштыше Адам гоч айдеме тукым мом йомдарен, ме тидым ынде Ылыж кынешше Христос дене ушнымаште налына.

Мемнан ылышнан тӱнгалтышыже да негызше – Юмо! Тудын деч торлена гын, ылышна начарештеш, мемнам сулык сенга да колымаш дека конда. Христос дене ушнен илена



гын, апостол Павел манмыла, «Христос гоч чылан ылышым налыт, но кажне шке черетше дене...» (1Кор. 15:22-23). Христос дене ушнен ылышыже мом ончыкта? Утарыше Христос тиде йодышлан вашмутым Иоанн деч Поро Уверыште (Евангелийыште) Шке пуэн: «...кӱ Мыйын шомакем колыштеш да Мыйым Колтышылан ушана, тудын курымашлык ылышыже уло. Тудо ок судитлалт, а ынде колымаш гыч ылышыш куснен. ... Вет жап толеш, кунам шӱгарысе-влак чылан Тудын йӱкшым колыт да лектыт – кӱ порым ыштен, тудо илаш кынешеш, кӱ осалым ыштен, титаканыш лукталташ кынешеш» (Ин. 5:24, 29).

Христос Шкенжын Ылыж кынешмыж дене осаллыкым сенген. Но осаллык мемнан тӱня гыч йомын огыл. Кажне ег ончылно осаллыкын пырдыжше уло: кӱраныме, кугешныме, шойыштмо, ӱкымеш ыштыктыме, ужмошудымо койышын аярже дене темше умдо шӱмышкына колымашым пурта. Шӱмышкына Христосым пуртена гын, ме кӱргыштына улшо осаллыкым сенген кертына. Вет шӱм – тиде тугай духовный вер, кушто ме але Юмо дене, але тудын тушманже дене вашлийына. Мом ойырен налына – тудак лиеш: але курымаш ылыш, але суд да судитлымаш.

Христосын сугыньлен кодымо йӱратымашым да православный ушанымашым арален илаш ушам. Апостол Павелын мутшым шарныза: «...Иисусым Господь манын, тый йылмет дене ег ончылно почын ойлет да, Юмо Тудым колымаш гыч ылыжтен манын, шӱмет дене ушанет гын, утаралтат» (Рим. 10:9). Ылыж кынешше Христос нерген поро уверым ме ончыкыжат уло тӱнялан шараш тӱнгалына!

**Христос чынак Ылыж кынешын!  
Волжск ола,  
2021 ий Христосын Кугечыже.**

# ЭМЕКОВО СЕЛАШТЕ САРЗЕ МОШТЫМАШЫМ ВИЯНДАТ



**Р**оссийысе «Шашке дене руымаш «Казарла» федераций» мер ушемын Марий Элысе пөлкаже 17 апрельште Эмеково селаште шашке дене руэн моштышо-влак коклаште тангасымашым эртарен. Эмековосо «Покровский хутор» казак ушем польшкалышыже лийын.

Сарзе моштымашым вияндыше ты тангасымашыш Пензе, Самара, Ульяновск, Угарман, Виче областыла, Татарстан, Мордовий, Чуваш да Марий Эл республиккла гыч казак-влак погыненыт.

Тўнгалтыште молебен лийын. Тудым Эмеково селасе Юмын Шочыктышо Эн Святой Аван Леведмыже лўмеш черкын настоятельже протоиерей Евгений (Усков) эртарен. Евгений ача саламлыме мутыштыжо тыге каласен:

– Таче шуматкечысе службо «Эн Святой Юмын Авам моштымаш» маналтеш. Тиде кечын Святой Черке Константинополь олан кугу азап деч утаралтмыжым шарналта. Тудо жапыште олам чыла вечын тушман авырен улмаш. Польшым нигд деч вучаш. Тидым умылымек, калык Юмын Авам чот сөрвалаш тўнгалын. Эн Святой Ёдыр нунын йодмыштым шуктен, тушманым шалатен колтен, калыкым утарен. Тиде жап гыч Черке тиде торжеством палемда. Тангасымашнам таче кечын эртараш Юмын Ава шкеак полша. Ме чыланат Ачамландын эргыже улына. Ача-влак руш мланде верч шогеныт. Тидым ме шарнен илена. Теат шке ача-кочадам ида мондо. Тек тиде мероприятийыште Юмын шўлышыжў лиеш. Селашкына толшо иза-шольына-влакым ужына да чоныштына куан тул ылыжеш. Ме пырля да икоян улмыланна куанена. Икоян лиймаш казачествым пенгыдемда. Тиде келшымашым аралаш ўжам, коклаштыда эреак йўратымаш илыже.

Тангасымашыш толшо-влакым Марий Эл Кугыжаныш Погынын депутатше В.Т. Кожанов, Волжский муниципальный районым вуйлатыше В.И. Сергеев, Волжский район администрацийым

вуйлатышын алмаштышыже С.В. Сычѳв, Эмеково поселенийым вуйлатыше Х.В. Гаврилова саламленыт.

– Тиде кугу мероприятийыште тендам ужаш моткоч куанле. Пўлек шотеш Марий Элысе пўлकалан Николай Чудотворецын юмонажым кучыктынем. Пеш шукерте тиде святой Кавказыште служитлыше кочамлан чот полшен. Тек святитель тыландат эреак полша. Тек Марий Элысе казачестве виянеш. Тыгай тангасымаш самырык-влакым шке элым йўраташ, аралаш туныкта. А занятийлаште кучылташда шашкым пўлеклем, – каласен В.Т. Кожанов.



– Марий мландынан Юлсер кундемыштыже тендам куанен вашлийына. Адакше районнажат спортым йўратыше. Моло спорт мероприятий дене пырля таче казачестве дене кылдалтше пеш онгай, шкешотан тангасымаш эрта. Пайремым ямдылыше, эртарыше-влаклан, участник ден уна-шамычлан мемнам пагален толмыштлан кугу тау. Таче тыгак Волжский районысо кадет-влакат тангасаш тўнгалыт, тидыжат мемнам куандара. Ёшаныме шуэш, ты мероприятий йўлаш пура», – ойлен В.И. Сергеев.

Волжский районысо кадет-влак шотышто кугешнен каласыман: нуно тангасымашыш



ушненыт веле огыл, эше сенгышыш лектыныт: мутлан, тўнгалтыш нелылыкан упражнений-влакым шуктымаште икымше верыш Эмеково гыч Денис Трутников лектын, кокымшыMAT Эмеково рвезе Никита Браслетов налын, кумшо вер дене Приволжский посёлко гыч Антон Семенов палемдалтын.

Тиддеч посна тагасымаш тўрлө лийын. Лўмын ямдылыме верыште ик але шуко мишеньым шашке дене руэн кышкымаш, палым ыштыман да тыгак упшан уа укшым руымаш да тулеч молат. Тагасымашын тўн судьяжлан Российысе «Шашке дене руымаш «Казарла» федераций» мер ушемын енгжым В.А. Угроватовым ойырымо.

Мероприятий сенгыше-влакым палемдыме да шарнымаш фотом ыштыме дене мучашлалтын.

– *Россий кўкшытан тыгай тагасымашым Эмеково мландыште эртараш – кугу чап. Казачестве мемнан дене шукерте огыл почылтын, туге гынат теве икымше гана Российын кандаш регионжо гыч казак-влакым погышна. Тидыже Россий казачествым вуйлатыше-влакын мыланна ўшанымыштым ончыкта. Шкеже казак-кадет-влакым куштена, сандене нунин тачысе тагасымашым ончымышт да вийыштым тергымышт мыланна пеш пайдале лие. Марий Эл Кугыжаныш Погынын депутатше В.Т. Кожановлан спонсор полишым пуымыжлан кугу таум ойлена, – палемдыш Российысе «Шашке дене руымаш «Казарла» федераций» мер ушемын Марий Элысе пўлкажым вуйлатыше А.Е. Глухов.*

**Денис СМИРНОВ.**

**Юлсер кундем.**

**Авторын фотожо-влак.**



## ЭН ВУЧЫМО КЕЧЕ – КУГЕЧЕ


Ушошо кече шем вўргенчыкшым кудашын. Эр кече пўтынъ тўням волгалтара, утыр ырыкта. Ял калык коклаште, тыштат-туштат, чыла вере Кугечылан ямдылалтме нерген мут шокта. Пўрт кўргыштў пуракым ўштын, тувыраш гыч тўнгалын, пырдыж, кўвар, окна йотке мушкын луктыт. Пўртўнчыл, клат, веранде, кудывече – чылажат арулык дене кумылым нўлтат. Тыгак капка ончылым, пўрт йырысе кумдыкым Кугече вашеш арунак эрыктат. Пўрт йыр саварым шотыш кондат, а шўкшў гын, вашталтен, уэмден печен налашат, чиялташат уто огыл. ПушенгыMAT ты пайрем вашеш шындаш гын, пайдале сомыл. Чылажат сылнын койшаш.

Энерлаште але ерлаште, пўяште, вўд бакым шў-тен, ег-влак вургемым мушкыт. Эр гыч кас марте тыршат. Мушкаш тўрволак вўдыMAT кучылташ пеш йўрале – пушкыдо лумын вўдшў вургемым эрныктара. Мончаш пурымо годымат лум вўд пайдале. Мландывач лумжат ынде сакыр гай вашке шула, олыклаш ташлымешкак сита, йогын вўд коремла гоч йоген эртен, энерлаш ушналеш. Унала толшо кайык-влак сылне семым пўлеклен, пўртўсым эшеат ылыжат. Йырваш чыла чонан помыжалтын. Вўталаште, мланде пушым шижын, ушкал-влак ломыжалтат, «Кўтўш кайынена-а!» манме гай шокта. Левашлаште шорык пача, каза пача-влак аваштын водарыштым юпкалтарат, кечышке лектын, модын-тўршталтат. «Ме-а-ат лекнена-а!» маншыла йўкланат.

Леваш ўмбалне пырыс колям ваген шинча. Капка ўмбалсе у шырчык омарташат илыш ылыжеш. Шырчык-влак эр годсек тушто пыжашым опат. «Шои-ик» шергылтарен, шўшкалтен колтат. Сур турий, шокшо кечым сўрен, кўшнў вуй ўмбалне эр годсек чўчкен пўрдеш да тыныс кечымак сўра, ваш келшен илаш ўжеш. Кугечым, тынысле Юмын пайремым, эн чот вучена!

**Галина КУЗЬМИНА.**

# ЧАН ЙҮК ПОЛШЕН



**Т**иде историй Угарман (Нижегородский) областыш пурышо Арзамас районысо ик ялыште лийын. Кугече годым кўчызё ўдырамаш пёрт еда йодышт коштын. Сонгыра да йылмыдыме Лёнкамытын пёртышт дека шуын да йодын:

– Христос лўм дене сөрвалем, мо дене полшен кертыда, полшыза.

Тудлан чиялтыме муным пуаш манын, озавате эргыжым колтен. Чевер муным кучен, Лёнка куанен куржын.

– Христос Ылыж кынелын! – манын тудлан кўчызё ўдырамаш.

Рвезе нимом вашештен огыл, вашешыже шыргыжын гына.

– Лўмет кузе? – адак йодын ўдырамаш. Вашмут укеат, аважым ўжын кондаш кўштен.

– Эргычше молан ок кутыро? – йодын Дария деч.

– Умбалнем кугу сулык уло. Тудо таза шочын, но ырлыкан (корь) дене черланен. Тунам мыйын латкок икшывем лийын, чыланат кўварвалне малынт. Изи азам шокшырак верыш пышташ кўлын, а мыйым ияже шурен – вуйышто шонымаш пёрдын: «Кола гынат, нимат огыл, мыйын теве эше мыняр шочшем уло». Но аза колен огыл, кылмен черланыме дене пылышыже коршташ тўнгалын, да сонгыра лийын. Тидлан кўра мутланаш тунемын огыл. Врач-шамычат полшен кертын огытыл.

– Ит шорт, тудын пылышыже почылтеш да колаш тўнгалеш. Саров монастырьыш колто. Колокольныйшто служитлыже, чан йылмым мушкын, вўдшым йўжё, – манын кўчызё ўдырамаш.

Аваже тидым эргыжлан умылтарен. Шкеже чаманен ойлен:

– Кё гын тыйым тушко нангая? Ачат черле, мый ом ярсе.

Кугу ўшан дене Лёня мўнгё гыч шкетак лектын каен. Туддеч увер кужу жап лийын огыл. Ава ойгырен, шортын кумалын. Куанле кечым ужшаш пиалжат лийын улмаш: Лёня пёртылын. Тора гычак эргыжым пален, ава вашлияш куржын. «Авай!» манын, ваштарешыже Лёня вашкен.

– Эргым, тый мутланен кертаат? – ёрын Дария.



– Чылажат саде кўчызё ўдырамашын каласымыж семынак лие. Мый Саров монастырьым муынам, тушто колокольныйшто служитленам, чан йылмым мушкын, вўдшым йўынам, кумалынам. Чангым сайын кыраш тунемынам, сандене монах-шамыч мыйым тушеч ынешт колто ыле, – умылтара эрге.

Мутшо ончыч нелынаракын лектын, умылаш йёсё лийын, но эркин дене сайрак ойлаш тўнгалын. А вес егын ойлымыжым Лёня тўрвё тарваныме гыч умылен. Тудын дене мутланыме годым, ўмбакеже тўткын ончен, мутым раш ойлаш кўлын.

Вара Лёням глухонемой-шамычын школышкышт тунемаш пуэныт, тушто кем ургызын пылышкалышыже лийын. Тиде пашаште кугу мастарлыкше почылтын. Кемым ургымо але ачалымылан акым кугун налын огыл. Ик улан ўдырамаш тудлан туфлыжым ачалаш пуэн. Чиен ончымеке, ачалыме йолчиемын ончычсыж деч йёнанрак улмым шижын. Ты ўдырамаш Лёнялан шуқырак оксам пуынеже улмаш, но тудо налын огыл.

– Тый шке мастарлыкетын акшым от пале, – манын тунам ўдырамаш, а сайын ачалыме йолчиемым кужу жап йёратен чиен.

Моло глухонемой-шамыч дене мутланыме годым Лёням кусарышылан чўчкыдын ўжыныт, тыгак тудлан 1-ше группо инвалидностьым пуэныт.

Саров монастырьыш мийымыже да Юмын кугу порылыкшо дене тудо тичмаш илыш дене илаш тўнгалын.

Татiana ЛУКИНА.



## ПАШАМ ЙӨРАТАШ КҮЛЕШ

**Пашам йөраташ күлмө да икшивылан профессиональ чын ойыраш полшымо нерген преподобный Паисий Святогорец тыге ойлен коден:**

– Паша – тиде Юмын пуымо пөлек. Паша капкылым ылыжта, ушым яндарешта. Юмо пашам огеш пу гын, айдеме шукертак пунышкен пытен ыле. Пашаче ег чот шонгеммекежат пашам ыштымыжым ок чарне. А вий улмо үмбачак тыршымым чарна гын, ойгыраш тўналеш, кумылдымо лиеш. Паша деч посна кодмо тудлан колымо дене иктак.

Каласаш күлеш: улыт тыгай ег-влак, кудышт эре канаш гына шонат. Паша деч посна илаш нунылан келша веле, тыге пуйто капкылыштым кандарат. А кунам айдеме эре кочкеш, йүэш, кана, ок тарваныл, пашам ок ыште, тунам көргыштыжө «винтик-шамыч» лушкат, сандене ончыкыжым тудын нимом ыштымыже ок шу, нерен коштеш. Жап эртымек, ошкылашат тудлан неле лиеш, шүлештылаш тўналеш. Чонжат пустангеш, ты пустаныкым вургыжмаш темаш тырша, сандене ты ег эре кумыл волышо коштеш.

А кө пашам ыштен ноя, тудын чонжо куан дене темеш. Ты егын вийжат ситыше, капкылжат таза лиеш.

Паша – тиде тазалык, поснак самырык еглан. Шкат шижын улыда дыр: аван шулдыр йымалныже илыше рвезат ончыч армий гыч пенгыдемше пörтылеш ыле. Армий тудым чын пörьенгым ыштен. А кызыт армийыштат рвезе-влакым «тургыжландараш» пешыже огыт тошт, вет уке гын нунын нервышт тарвана, вүргорныштым пүчмышт дене лүдыктылит.

Ача-ава-влаклан теве могай кангашем лиеш: йочадам тазам ужнеда гын, пашам ышташ туныктыза. Шке огыда керт гын, вес ег деке колтыза. Йочадам пашам ышташ да шуктымо сомалжым йөраташ туныктыжо манын, тудлан эсогыл оксам тўлаш темлем. Рвезе ушан да

виян гынат, пашам ыштыде ила гын, эркын-эркын вийдыме лиеш, вуйдорыкшат «олым» дене темеш. Йолташыжын сенгымашке шумыжым ужеш – кумылжо эшеат чот вола. А диаволлан тидак веле күлеш, шакше пашажым тўналеш: «Ончо, – манеш. – Иктагашет-влак кокла гыч иктыже – палыме туныктышо, весе шке пашам почын да оксам куш чыкаш ок пале, а тый? Пиалдыме, куш илен шуат?» Диаволын мутшо рвезын вуйышто көранымашым, ужмошудымашым шочыкта. Але рвезе шкенжым нимолан йөрдимылан шотлаш тўналеш. Шарныза: пашам ыштыше егын ушышто гына түрлө күлдымө шонымашлан шочаш жап огеш код.

Йочалан ончыкылык профессиональ ойырымго годымат ача-авалан тўткө лийман. Южыжо шкешт могай профессиональ ойыренит, тудымак йочаштлан тушкат. Виеш ыштыктыме дене икшивыштым локтылит веле. Вет йоча, ача-аван мутшым колыштын, нунын күштымыштым шукта гынат, илен-толын, ик паша гыч вес пашаш куснылаш, шке вержым кычалаш тўналеш але шкенжым йөршеш йомдара. Але үмыржө мучко чонжылан келшыдыме пашам ыштен, нойышо да илышлан сырыше лиеш.

Тыге ынже лий манын, ача ден ава үдырыштын але эргыштын молан шүман улмыштым нунын изишт годымак шекланен шуктышаш улыт. Йоча музыкым йөрата – тек музыкант лиеш. Але тек черке хорышто мура, мурымыжым колыштшо еглан молитвам умылаш полша, черкыш чүчкыдынрак кошташ тарата. Йоча сайын сүретла – тек сүретче але иконым возышо лиеш. Ала илен-толын тудын иконыжо öрыктарыше вийым шараш тўналеш. Йоратыме пашам шуктымыж дене айдеме жапымат, нойымымат огеш шиж. Тыгай егын чоныштыжат куан да ласкалык верым налыт, тугеже тудын илышыжат Юмылан келшыше лиеш.

Анфиса ЭМАНОВА ямдылен.



## АВАН МОЛИТВАЖЕ

**А**фганистаныште 1986 ий 10-11 май йўдым Адесантник Виктор Чередниченко деке Юмын Ава толын, а кечывалымже моджахед-шамыч дене неле кредалмаш лийшаш улмаш. Виктор тудо жапыште Юмылан ўшанен огыл, партийыш пурен, партбилет налым вучен. Юмын Аван толмыжо тудын уло ылышыжым вашталтен, вет ты кечын Тудын полшымыж дене шкеат ылыше кодын, йолташыже-шамычымат колымаш деч утарен. Тидлан Виктор Йошкар Шўдыр орден да «За отвагу» медаль дене палемдалтын. Куд ий эртымеке, Афонисо Свято-Пантелеимон лўмеш Руш монастырыште лиймыж годым Виктор туддеке толшо Юмын Ава дене вашлийын – «Афон Курыкын Игуменьяже» юмонга гыч Тудо ончен.

**Запасын старшинаже Виктор Михайлович Чередниченко**н шарнен каласкалымыже:

– Афган сарыш мый 1984 ийыште логалынам. Тиддеч ончыч парашютист-влак курсым эртенем, вара кум тылзат пеле Ферганаште служитленам. Тушеч мемнам, кандаш еным, Т-62Д танкым вўдаш тунемаш колтышт. Тунем лекмеке, Кабулыш, ВДВ дивизийын танк батальонышкыжо, нангайышт. Афганистаныште улмо годым мый Юмынполышым эрешижынам, ночылажатавамын молитваже полшымо дене лийын. Изина годым авана мемнам чўккыдын ыресла ыле. Акамым школышто комсорглан сайленытат, тудыжо «Авай, мом ыштылат?» манын сыра ыле. Мый гын чон ласкалыкым шижынам. Афганистаныш кайымым годым авам шке кидше дене возымо молитвам мылам пуэн, тудым кызытат аралем. Замполитлан кўра Афганистаныште ыресым нумалыштын онал.

Мыйын колен кертшаш кок неле ситуаций эре ушыштем. Икана мыйым да Пётр Кораблёвым Вардагыш ик кишлакым тергаш колтышт. Пуста гай койшо ик пўрт омсам шўкалым – ок почылт, сайынак шўкалым – почылто, но «шылт» шоктыш. Петя тидым колын шуктен да снаряд пудештме деч ончыч мыйым йўрыктен, шке капше дене леведын.

1986 ий 9 майыште мемнан деке Иосиф Кобзон толын ыле. Концерт пытымеке, мый сценыш лектым да панамым пўлеклышым. Тудо микрофоныш каласыш: «Союзыш пўртылмекеда,

концертышкем мийыза, пароль «Кабул» лиеш, тендам яра пуртат». Латвич ий эртымеке, мый тудын концертышкыже тыгакак пурышым. А тунам концерт деч вара ме палаткыш толна, гитарым шоктен мурен шинчылтна. Мый тунам кок ийым служитленам ыле, дембель лийынам, но партбилет налым вученам.

Трук палаткыш полкын политотдел начальникше капитан Яренко пурыш да ойла: «Виктор, тыгай паша... Кредалмашке каяш кок дембель кўлеш». Мый манам: «Капитан йолташ! Дивизийын командирже Павел Грачёв дембель-шамычым налаш кўштен огыл вет!» Ала-молан тунам дембель-шамыч чўккыдын колат ыле. Капитан нимом ыш вашеште, савырнен каяш ямдылалте, а мый йодым: «Операцийже кушто лиеш?» Тудо мане: «Чирикарыште. Тушто землякет Саша Корниенко шукерте огыл, 10 апрельыште, колен». Капитанлан «Мый каем» манын каласышым. Белоруссий гыч Саша Санникович мане: «Мыят пеленет каем».

Эрлашыжым, 10-11 май йўдым, мыланем омо конча: мый авамым ужам. Авам ден акам «Волга» машина дене кудалыт, мый почешышт куржам да «Авай, авай» манын кычкырем, а нуно мыйым огыл кол. Мый шўртнем, пуренгаем да уло шўргем сусыртем, вўр чот йога...

Помыжалтым, кум шагат эр ыле. «Мый вет таче тушанак кодам, – шоналтышым. – Кеч авамым ужын кертшаш ыле». Тыгодым палатке чытырналте да палаткыш шемалге-йошкар тўсан монах вургеман ўдырамаш пурыш. Тудын моторлыкшо нерген каласен моштшат ок лий, тиде шымалык да йўратымаш дене темше кўргў моторлык ыле. Тудо ик мутымат ыш пелеште, лишкем тольо да мыйым ыреслыш. Мый Тудын шинчашкыже ончем, Тудо мыйын шинчашкем онча. Вара кокымшо гана мыйым ыреслыш. Пурла велне Костя Шевчук мала ыле. Мый тудым кычкырем, ойлем: «Костя, Юмын Ава толын!» Тудо помыжалте, йыр ончышто, но нимомат ыш уж да мане: «Витя, тыланет вашке кредалаш кайыман, мале...» Ўдырамаш эше изиш шогыш, мыйым кумшо гана ыреслыш да палатке гыч ийын кайыме гай лекте. Тунам мый умылышым – илаш тўналам!

Пел шагат гыч посыльный ўжаш тольо. Чирикарыш кугу колонно дене пурышна. Ончылно – бронироватлыме тягач, тудын почеш разведке, вара рото командир Чернышёв, почешыже мый каена. Тунам мемнан дене пырля эше дивизий командирын алмаштышыже Бочаров ыле. Чирикарыш пурен веле шуктышна – тушман-шамыч тунамак мемнан икымше да мучаше машина-шамычым пудештарышт! Авырен, уло колонным кишлакеш ишышт. Мемнан коклаште сусыргышо ден колышо-влакат лийыч. Тунам ме раций дене вертолётым ўжна. Вертолёт шичме вер воктене кўкшака ыле.

Ала-мом шижме семын шўмем шуралтыме гай чучо, да мый пулемёт воктеке шинчым, пушкым кўкшака велыш савыраш кўштышым. Сусыр ден колышо-влакым налын, вертолёт нўлталташ тўнале веле, кўкшака шенгеч лач кабин



ваштареш пулемётан треножник койылалтыш. Командир деч йодын шуктыде, мый «Огонь!» командым пуышым. Күкшака да пулемёт деч нимо ыш код. Ончем, пурла велне Чернышёвын танкше ваштареш гранатомёт дене душман лектеш. Ме туддене икте-васынан шинчаш ваш тура ончышна, но мый тудым икмыняр секундлан ончылтен луйышым. Тугай чот луйылтмаш тунгале: кушто шкенан-шамыч, а кушто тушман – умылашат ок лий. Ме пытартыш снаряд, пытартыш патрон марте луйылтна. Эрдене частыш толна. Мый декем дивизий командирын алмаштышыже Бочаров лишеме да каласыш: «Эргым, мый чыла ужым. Фамилиет кузе?» – «Старшина Чередниченко, 3-шо рото гыч». Тудо вачем гыч вучкалтыш да кайыш.

Вес кечын полкын политотдел начальникше Яренко мыланем мане: «Виктор, тыйым да Санниковичым дивизий политотделыш срочно ўжит!» Тушто Саша ден когылянна партбилетым кучыктышт да Союзыш колтышт.

13 майыште мый Киевыште лийынам. Авам дене пырля Владимирский соборыш кайышна. Шонго священник Николай ача туткын ончале да каласыш: «Эргым, шарне! Тыланет илыше кодаш манын, ават тыште кажне кечын сукен кумалын!» Аван молитваже тамык пундаш гыч луктын кертеш манын, тунам мый раш умылышым.

Юмын Аван Афганистаныште кончышо тусшым эре ужаш шоненам. Авам дене шуко храмыш, монастырьыш коштынна, но саде тусаным муын огынал. 1992 ийыште духовником Роман ача Афонысо Свято-Пантелеимон лүмеш Руш монастырьыш каяш благословитлыш. Мый тушто суксо гай ең-шамычым вашлийынам. Икана храмыште кумал шогыдем годым ўмбакем ала-кө ончымым шижым. Вуем савырышым да Юмын Аван палаткыште кончышо тусшым ужым! Мый сукен шинчын шорташ тунгалым. Тымарте пеш пенгыде лийынам, илышыштем нигунам шортын омыл, тиде икымше шинчавүдем ыле. Көргышкем пуйто волгыдо пурыш. Мый иконо деке лишемым, тудым ондалын, уло чон дене «Авай!» манын каласышым. Монастырьын духовникше Макарий ача мыйым шке кельшыкыже пуртыш да тиде юмога дене благословитлыш.

Афганистан нерген шуко ойлаш лиеш. Тушто мый вич гана фугас да противотанковый мине пудешталтмашке логалынам. Тидым чыташ пеш неле: вуй коршта, пылышыште шүшка, нимом каласен от керт, укшинчыкта. Илыше улметым шижат да тыйым ала-могай өрыктарыше вийын утарен кодымыжым умылет. Аван молитваж дене да Юмо полшымо дене шуко салтак тыге утаралт кодын.

Мый ынде палем: Юмо – тиде чыла! Сандене православный вера деч шкеат нигунам ом коранг да чылаштымат Юмылан ўшанаш ўжам.

**Анастасия ЧЕМЕКОВА** ямдылен.

## ШОЧМО КЕЧЕ ДЕНЕ САЛАМЛЕНА

**Йүдвел-Касвел черке кундемын благочинныйже, Килемар посёлкысо Илия пророк лүмеш храмын настоятельже протоиерей Андрей Романов 13 апрельыште 50 ияш лүмгечыжым палемден.**

Тудо Астраханьыште шочын. Икмыняр жап гыч ешыже Марий Элысе Волжск олаш илаш куснен. Верысе школым пытарымек, рвезе Зеленодольскысо механике техникумышто электромеханиклан тунемын. 1998 ийыште ўдырым налын. Ты ийынак 7 ноябрьыште Йошкар-Олан да Марий Элын епископшо диаконлан, а 20 декабрьыште священниклан шогалтен. Андрей ачам Килемар посёлкыш служитлаш колтеныт. Вич ий гыч ты храмын настоятельже лийын. 2004 ийыште Йүдвел-Касвел черке кундемым вуйлаташ ўшаненыт. Ты округыш Килемар ден Оршанке район-влак пурат. 2007 ийыште Андрей ача Владимирысе Духовный семинарийым заочно тунем лектын, а 2009 ийыште тудым протоиерей дене палемденыт.

Андрей ачан вачымбакыже кугу сомыл возын: йўлен кайыше пу черке олмеш у кў оралтым нўлташ кўлын. Но тудын тыршымыж да Юмын полшымыж дене шонымашке шумо: 2020 ий 4 октябрьыште Йошкар-Олан да Марий Элын митрополитше Иоанн ден Альметьевскын да Бугульман епископшо Мефодий у черкым святитленыт. Храм пелен Рушарня школ, православный йочасад, икшыве-влаклан кенгежымсе лагерь пашам ыштат.

Андрей Романовын характеристикыштыже возымо: «... Тале организатор. Самырык-влак, йоча ден педагог-шамыч коклаште поро шўлышым шара, ваш умылымашым, йўратымашым шындыра. Шке приходиштыжо веле огыл, моло тўшка мероприятийым эртарыме годымат, мутлан, «Благой ковчег» але Молевой ер воктене «Семья – малая церковь» фестивальлаште, шке йырже калыкым чумырен мошта...»

Юмылан порын служитлыме жапыште Андрей ача набедренник, камилавке, наперстный ырес, палице дене палемдалтын. 2020 ийыште Москон да уло Русьын Патриархше Кириллын пунчалже дене тудлан сылнештарыме ыресым нумалаш права пуалтын.

**Андрей ачам чапле Шочмо кечыж дене саламлена, пенгыде тазалыкым тыланена. Руш Православный Черкым чапландарыме пашаштет тек Юмо полшен шога! Кужу курыман лий!**



## «МАМА ЧАЧА» ПАЙРЕМ

Кө ок шарне изи годсо жапым... Шошо кечын, тўшкан-тўшкан погынен, шертне укшым - мама чачам - погаш юарлен куржмынам мыят эре шарналтем. Воленна Элнет энгерын күкшө серышкыже. Йолыш лум ынже тем манын, кем шулышнам йыдал кандыра дене пенгыдын кылденна. А кемна лийын огыл гын, йыдалым чийымеке, ыштырым эшеат сайынрак пидынна, йыдал кандыранам эшеат пенгыдынрак шупшыл шынденна. Коремла гоч эртен, күкшакаште шогышо мама пушенгын воштыржым, «мама чачам», погалынна. Талырак йоча-влакше пушенгыш күзен, мама воштырым каткаленыт. А ме, кормыж тич поген, вичкыж шүртө дене пидышым ыштенна. Вара, чылаланна иктөр пайлен, коремйолышто вүд эшеат шукемын кертмым шотыш налын, мөнгө вашкерак куанен куржынна. Вет яндар юмылук, юмышөрлык, юмыншовыч мемнам вученыт. Авана-влак мемнам йывыртен вашлийыныт. Вүд ташлыме деч ончыч толын шумылан да корем гоч лектын кертмылан куаненыт...

Шуматкечын кечывал деч вара тиде поро паша ышталтын гын, авам рушарнян эрденак яндар вүдым памаш але таве гыч конден. А вара эр кочкышым үстембак погаш ямдылалтын. Эрденак перемечым күзштын, подкогыльымат шолтен. Сортам чүктен, Юмылан пелештен, перкем йодын, тамлен-тамлен кочкынна. Авам эше мелнам лугалта ыле, а кечывал лишан күзштын. Свежа тутло мелнам кумылын тамленна. Шудо чайжат пеш тутло лийын. Тыге рушарнян Юмын кечым, «Мама чача» пайремым, чон йывыртен, Юмын шўлышым шижын, палемденна.

Тачат ты Юмын йўлам порын шуктен шогена. «Мама чача» пайремлан ончылгоч ямдылалтын, мама воштырым конден, юмышөрлыкыш веранген, чесым лынг поген, сортам чүктен, Юмо деч пиалым, тазалыкым йодын, алал кумылын пелештена. Юмын йўлана нигунамат ынже мондалт манын, у тукумланат ушештаренак, палдаренак шогена.

Галина КУЗЬМИНА.  
Морко район.



## КУЗЕ ЮМО УНАЛА КОШТЫН

Туныктен каласыме шомак семын

Йўдым ўдырамашлан кончен омо.  
«Вучо, миём тый декет Мый унала тачак, –  
Ойлен тудлан пуйто Шкеак Юмо. –  
Тый ит кай нигуш, лий мөнгыштак».

Ўдырамаш вашке гына кынеле,  
Вик тўнгале пөртым эрыкташ.  
Ўстел сийым мом погаш, ок пале,  
Да тўнгале иктым-весым ямдылаш.

Конгаш олтыш, шўрым пуртен шындыш,  
Тамле пуш ден теме пөлемат,  
Вашкерак руашымат лугалтыш:

«Ыштен шуктем ала мелнамат?»

Пеш вуча, тырша шукташ пашажым...  
Вот омсашке эркин тўкаллат,  
Почо ўдырамаш, пөръенным ужо:  
Тошто пеш вургем, лавыран шкежат.

Өрө ўдырамаш, тыгайым вучен огыл,  
Мо күлеш еглан, пален налмек:

«Мыйын жап уке, ом ярсе пукшаш тыйым!»

Поктен колтыш тудым шке пошкудыж дек.

Шкеже адакат пашалан пиже,  
Күлеш эше шукым вет шукташ.  
Адакат омсашке ала-кө тўкалтыш.  
Почо – шинчаш перныш рвезе изирак.

Тудымат пошкудо деке поктен колтыш,  
Угычын тўнгале вучаш Юмымак.

Чыла ямде: тамле шўр пушланыш,

Ўстембалнак мелна кышылжат.

Кумшо гана ала-кө тўкалтыш –  
Омса воктен ўдырамаш шоген,  
Кидыште – йоча, а тудо шкеже,  
Вик коеш, моткоч ярнен пытен.

Озавате пөртышкө ыш пурто,  
Колтыш уна-влакым адакат поктен...

Шуо кас, тетла йўкат ок шокто...

Умылыш: Юмым ыш шукто вучен.

Йўдым ўдырамашлан кончыш омо,  
Эртен кодшо кечым иктешлен.

Пуйто угыч толын туддек Юмо,  
«Молан шыч тол?» йодмылан ойлен:

«Кум гана вет тый декет Мый тольым,  
Но шыч пурто мыйым пөртышкет...»

Шарне, лудшо танг, кертеш тыгакак толын  
Унала ик кечын Юмо тый декет.

Лидия АЛПАЕВА.  
Юлсер кундем.

МАЙ

ПН		3	10	17	24	31
ВТ		4	11	18	25	
СР		5	12	19	26	
ЧТ		6	13	20	27	
ПТ		7	14	21	28	
СБ	1	8	15	22	29	
ВС	2ХВ	9	16	23	30	

- дни особого поминовения усопших
- сплошные седмицы
- постные дни
- разрешение на пищу без растительного масла
- разрешение на рыбу
- разрешение на растит. масло
- разрешение на вино
- разрешение на икру рыбы
- полное воздерж. от пищи

**2 - Кугече! Иисус****Христосын волгыдын Ыльж кыелмыже!**

2 – Москвасе поро пиалан Матрона аванан кечыже.

3–9 – Волгыдо Кугече арня.

4 – Юмын Аван Иверский иконыжын кечыже.

**МАЙ. ЧЕРКЕ ПАЙРЕМ**

6 – Кугун орланыше Георгий Победоносецын кечыже.

8 – Апостол да евангелист Маркын кечыже.

9 – Сарыште колышо салтак-влакым уштымаш. Святитель Стефан Великопермскийын кечыже.

11 – Радинча. Колышо-влакым уштымаш.

13 – Святитель Игнатий Брянчаниновын кечыже.

14 – Юмын Аван Мирносицкий иконыжын кечыже.

16 – Миром кондышо святой ўдырамаш-влакын кечышт.

Преподобный Феодосий Киево-Печерскийын кечыже.

18 – Юмын Аван «Йуын пытарыдыме Чаше» («Неупиваемая Чаша»)

иконыжын кечыже.

21 – Апостол да евангелист Иоанн Богословын кечыже.

22 – Святитель Николай Чудотворецын кечыже.

*Волжск олесе соборын да Звенигово олесе, Кужанер, Мариец, Сурок поселкыласе, Актаюж, Кожласола, Микряково селалесе храм-влакын пайрешышт.*

24 – Апостол-влак дене төр улшо Мефодий ден Кириллын, славян калык-влакын туныктышыштын, кечышт.

Москван да уло Русьын Святейший Патриархше Кириллын святойжын кечыже.

25 – Священномученик Ермогенын, Москван да уло Русьын Патриархше да чудым ыштышыжын, кечыже.

**НЫЛЛЕ ИКЫМШЕ ИЙ ГЫЧ**

**Т**иде историйым Санкт-Петербург ола гыч военный священник, сарзе командировкышто шуко гана лийше да 2009 ийыште Кавказыште нелын сусыргышо протоиерей Димитрий Василенков каласкален.

Икана Димитрий ача Волхонский шоссеште верланыше ик кевытыш пурен. Лач тиде верыште 1941 ий сентябрьыште моткоч неле кредалмаш лийын. Пурен шогалмеке, тудо сын кайыше да чот лүдшö кевытчим ужын. Ўдырамашын шола кидшым ош шовыч дене пүтырымö улмаш.

– Мо лийында? – öрын йодын Димитрий ача.

– Батюшка, мый таче шкемым шке пытарынем ыле.

– Кузе? Молан?!

Кевытче шортын колтен да шинчавүд йöre каласкалаш тўнгалын.

Аннан (тыге лүмдена) эрденак кумылжым волтеныт. Эн ончыч мокмыран марийже чоным корштарыше мут-влак дене шўрдылын, ешартышлан йочажын температур вучыдымын күзен. Пашаш толмек, кевыт оза Анналан титак деч посна штрафым тушкалтен пуэн, а ешыште тыгакат окса ситен огыл. Телефон дене оза дене лўшкымеке, окын озалан, йўшö марийжылан да

ильшлан сырымж дене Анна илыш дене чеверласаш шонен пыштен. Телефон воктенак кийыше пўсö күзö дене шола кидшым пўчкын. Чот корштымо дене ўдырамаш изиш гына ушым йомдарен огыл, но ик тат гыч тудо, шонен пыштыме пашажым мучаш марте шукташ манын, вўран шола кидше дене таза пурла кидшыма тўчкаш тарванен. Но күзым нёлтал гына шуктен, кидше тунамак тарватен кертдыме лийын.

Лач ты жапыште омса почылтын. Кевытыш военный формым чийыше кум пөрьен пурен. Формыштышт погон уке, тачысе салтак-влакын гаят ок кой. Кумытынат ваче гоч винтовкым сакеныт. Анна, кид корштымым монден, ўмбакышт öрын ончен. Пөрьен-влакын шўргывылышышт моткоч волгыдо, ойртемалтше улмаш, пуйто нине ег-влак мемнан жап гыч огытыл.

– Мом ыштылат, ораде. Шкендым шке пытараш шонен пыштенат, ужат?! Тидлан көра мо ме нылле икымше ийыште тышак вуйнам пыштенна? Ме ТЕНДАН ВЕРЧ коленна.

Анна моткоч раш колын: «Шкендым шке пытараш шонен пыштенат, ужат?! Ме тидлан көра мо нылле икымше ийыште тышак вуйнам пыштенна? Ме ТЕНДАН ВЕРЧ коленна!»

Нунын тыгай пенгыде мутышт күшыч йонгалтше күштымаш гай чучын. Илышлан сырымаш, кумыл волымаш шикш семын шулен йомыныт. Юмылан тауштымо, тыгак элна верч, мемнан тыныс ылышна верч шке вуйыштым пыштыше да теве кызыт гына тудын ылышыжым арален кодышо салтак-влаклан тауштен, Аннан шинчаж гыч шинчавүд ташлен йоген лектын. Шовыч дене сусыртымо кидшым пүтырышыжла, ўдырамаш йодын:


– А тыланда кузе таум ышташ?

– А тый черкыште мемнам ушто, – шоктен вашмут. – Петр, Иван да Димитрий мемнан лүмна.

Протоиерей Владимир ВАСИЛИК.

Лидия АЛПАЕВА ямдылен.


# Куанен чиялтена



## КУГЕЧЕ – ПЕШ КУГУ КЕЧЕ.

Куанен ме вашлийына,  
Мунымат чиялтена,  
Пасхымат пеш ыштена.  
Ылыже Христос Юмына!  
Колымашым сенген мыланна көра,  
Илышым пуэн чылалан.  
Иктым – Юмым – моктыман!

Роман ЯТМАНОВ.  
Арын храм пеленысе  
«Пырче» Рушарня  
школ.



## ВАШЛИЯШ МЕАТ ЯМДЕ УЛЫНА

- Садыште кайык моторын мур,
- Лумат изишак веле кодын.
- Таче Кугу пүтö дечын вара
- Христос чынак ылыж кынелын.
- Лудына Евангелийым: сад, теке верже,
- Кушакын пыштеныт Иисусым.
- Толын тушко Мария:  
«Но кушто гын Шкеже?»
- Вашлийын олмешыже Суксым.
- Палена, кум кече гыч ылыж кынелын,
- Толын Тудо апостол-влак деке.
- «Лийже мир тыландак»,  
– чылакат саламлен,
- Кузе чучын чоныштан нунын?
- Калык верч орланен,  
колымашым сенген.
- Кечыжат таче лектын чүчкен.
- Пүртүс помыжалтын, пайремым вучен,
- Моткочак шүмнаже пырткен.
- – Христос ылыж кынелын!  
– ойлена йывыртен,
- – Чынак ылыжын! – вашмутым кол(ы)на.
- Апостол-влак семын Христос дене таче
- Вашлияш меат ямде улына.

Лидия АЛПАЕВА.

### “ШҮМ-ЧОН ИЗОЛЫК” МАРИЙ ПРАВОСЛАВНЫЙ ЖУРНАЛ

Учредитель: "Руш Православный Черкын Йошкар-Оласе да Марий Элысе епархийже (Московский Патриархат)" религиозный организаций.

Журнал зарегистрирован Управлением Федеральной службы по надзору в сфере связи, информационных технологий и массовых коммуникаций по Республике Марий Эл, свидетельство о регистрации ПИ № ТУ 12-0164 от 12 декабря 2013 года.

Тираж: 1500 экз. Формат - А-4-12.  
Журнал лекме жап - 30.04.2021 ий.

0+ - знак информационной продукции согласно ФЗ от 29.12.2010 г. №436-ФЗ.

Журналым редакцийште погымо да верстатлыме, «Куранты» ООО-што ямде оригинал-макет гыч савыктыме. Адресше: 429029, Татарстан, Казань, Сибирский тракт урем, 34, 14 корпус, 42-шо пöлем.

Редакцийын да издательын адресышт: 424000, Йошкар-Ола, Вознесенский урем, 81, 224-ше пöлем.

Тел.: (88362) 45-39-54.

E-mail: marlagazet@mail.ru

Түг редактор: Н.В. Чузаев (протоиерей).

Редакционный совет: И.А. Сапаев, Д.В. Смирнов, А.Н. Таныгина, А.П. Чемякова, А.В. Эманова.

Компьютер дене келыштарыше: Д.В. Смирнов.

Ак - кутырен келшыме почеш. Авторын да редакцийын шонымашышт түрлө лийын кертыт. Серыш-влак мөнгеш огыт колталт.

РЕДАКЦИЙ ЙОДЕШ: ЖУРНАЛЫМ ШАЛА  
КЫШКЫЛТАШ ОGYЛ. ЛУДЫНАТ - ВЕСЫЛАН ПУ!